



**Komunikadu Imprensa**  
**Semináriu Rejionál Munisípiu Dili**  
**05 Novembru 2021**

**Lideransa suku ho nia estrutura suku hato'o sira nia preokupasaun ba autór tribunál sira iha Semináriu Rejionál Munisípiu Dili**

Iha 22 Outubru 2021, JSMP realiza semináriu rejionál Munisípiu Dili ba lideransa suku ho nia estrutura kona-ba demokrásia knaar orgaun soberanu, partisipasaun públiku iha prosesu halo lei no asesu ba justisa formal. Partisipante sira mai husi Munisípiu Ermera suku Talimoro no Munisípiu Dili mai husi suku Bairu Pite, Kolmera, Bidau, Vila-Verde no Bekora ho total partisipante hamutuk 43 (feto 18 mane 25).

Orador sira iha semináriu ne'e mak Meritísimu Dr. Duarte Tilman Soares nu'udar Juis Konselleru iha Tribunál Rekursu, Dignísimu Dr. Jacinto Babo Soares nu'udar Xefe Prokuradória Distritál Dili, Ex<sup>ma</sup> Dra. Olga Nunes nu'udar Adjunta Defensória Pública Jerál no Sra. Ana Paula Marçal nu'udar Diretora Ezekutiva JSMP.

Durante sesaun apresentasaun, partisipante sira antusiasme ho esplikasaun husi orador sira no hato'o sira nia preokupasaun no husu pergunta barak relasiona ho asuntu justisa nian ne'ebé durante ne'e mosu iha sira nia suku, pergunta esensial sira balun mak hanesan prosesu krime violénsia doméstika (serake lideransa suku sira bele rezolve tuir kustume timor nian), prosesu alimentasaun ba labarik sira ne'ebé mak aman abandona, disputa rai estadu nian no kazu duun malu buan.

“Semináriu ne'e sai hanesan espasu ida atu fasilita oinsá públiku, liuliu xefe suku, membru konsellu suku no comunidade sira bele rona direktamente husi autór tribunál sira kona-ba sira nia knaar ka papel inklui fó biban ba partisipante sira atu hato'o direktamente sira-nia hanoin, komentáriu no preokupasaun sira liga ho asuntu justisa ba iha orador sira,” dehan Sra. Ana Paula Marçal, Diretora Ezekutiva JSMP.

Iha sesaun apresentasaun Meritísimu Juis Konselleru Tribunál Rekursu, Dr. Duarte Tilman Soares apresenta kona-ba knaar tribunál iha administra justisa tuir Konstituisaun no lei sira. Iha nia apresentasaun, juis konselleru ne'e hateten katak Timor-Leste hanesan Estadu de Direitu, signifika katak buat hotu tenke la'o tuir Lei inan ka Konstituisaun Republika Demokrátika no tribunál ezerse nian funsaun la'o tuir lei sira ne'ebé vigor ona iha Timor-Leste. Bainhira halo ninia kna'ar la-haree ba ema nia estatutu no sei decide ka fó pena bazeia de'it ba ema nia sala ka kulpa ka prova sira. Tanba ne'e meritísimu ne'e husu ba partisipante sira kuandu sai vítima ba kazu

Rua Beco Lakateu, Aldeia Manufuik, Suku Kolmera,  
Sub-distritu Vera Cruz Munisípiu Dili

PoBox: 275

Telefone: 3323883 | 77040735

[www.jsmp.tl](http://www.jsmp.tl)

[info@jsmp.tl](mailto:info@jsmp.tl)

Facebook: [www.facebook.com/timorleste.jsmp](https://www.facebook.com/timorleste.jsmp)

ida tenke lalais ba hato keixa iha Polísia ka Ministériu Públiku no suspeitu tenke ba iha Defensória Públiku ka advogadu privadu hodi defende nia direitu. Alende ne'e, meritísimu juis mós husu ba autoridade lokál sira hanesan xefi suku sira atu kuidadu bainhira atu rezolve ka tesi lia ruma, tenke haree mós kazu sira ne'ebé mak kabe ba iha kompeténsia xefe suku sira atu rezolve no iha kazu sira ne'ebé mak maski bele rezolve maibé ninia prosesu tenke kontinua la'ó tuir justisa formal.

Parte seluk, Xefe Prokuradór Distritál Dili, Dr. Jacinto Babo Soares, haktuir katak knaar Ministériu Públiku define ona iha Konstituisaun Repúblika Demokrátika Timor-Leste (RDTL), iha artigu 132 iha número 1 hateten katak Ministériu Públiku representa Estadu no ezerse asaun penál, asegura defeza ba menór no aujente no ema inkapaz sira inklui defende legalidade demokrátiku no promove komprimentu ba lei. Ministériu públiku nia serbisu tomak la'ó bazeia ba enkuadramentu legál sira ne'ebé vigora iha Timor-Leste.

Xefe prokuradór ne'e subliña katak dala barak ema rona prokuradór maibé ema la hatene saida maka Ministériu Públiku afinál Ministériu Públiku hanesan úniku instituisaun ne'ebé mak ezerse asaun penál iha Timor-Leste.

Tuir mai, Adjunta Defensoria Públiku Jerál, Dra. Olga Barreto Nunes iha nia apresentasaun hateten katak knaar Defensoria Públika iha fornese asisténsia legál ba ema kbiit laek sira tuir Konstituisaun no lei sira. Adjunta ne'e hatutan katak Defensoria Públiku nú'udar instituisaun ensesial ida ne'ebé konsagra iha Konstituisaun RDTL (artigu 135 número 2) ho funsaun prinsipál hodi fó kontribuisaun ba administrasaun justisa nian ida di'ak no salvaguarda sidadaun sira nia direitu no interese lejítimu no haree mós ba iha artigu 26 KRDTL ne'ebé hateten katak ema hotu-hotu iha direitu atu ba tribunál hodi defende sira-nia direitu no interese sira ne'ebé lei fó protesausun ba no labele nega justisa ba ema ida, tanba de'it nia laiha kbiit osan nian.

Tanba ne'e, adjunta ne'e subliña tan katak papel prinsipál husi Defensória Públika atu fó apoiu jurídiku no judisiáriu ba sidadaun sira kbiit laek no fó mós asisténsia ba iha kazu sira liuliu ba kazu abandona sira hanesan la'en husik hela nian feen no kaben fali ho feto seluk no la tau-matan ona ba iha oan sira. Nune'e nia enkoraza feto maluk sira ne'ebé mak la'en abandona inklui lakohi ona fó alementasaun ba sira ninia oan bele hato'o keixa ba iha Defensoria Públiku.

Parte seluk Sra. Ana Paula Marçal, Diretora Ezekutiva JSMP, alende apresenta kona-ba serbisu prinsipál JSMP nian, apresenta mós kona-ba progresu no dezafiu sira iha setór justisa no Parlamentu Nasionál nian. Pontu prinsipál sira balun husi PN mak hahú diskute lei importante sira no halo konsultasaun públiku. Mezmu nune'e, dezafiu sira mak iha audénsia públiku ne'e esbosu lei sira sei nafatin iha lian portuges nune'e difikulta partisipante sira atu kontribui di'ak liután ba esbosu lei sira. Dezafiu seluk mós Parlamentu Nasionál la dezenvolve programa nasional lejizlasaun ba iha kada lejizlatura atu bele tau asuntu prioridade sira.

Iha parte tribunál nian, progresu balun mak autór judisiáriu sira fó importansia no prioridade ba iha kazu violénsia bazeia ba jéneru no kazu korrupsaun sira. Husi dadus monitorizasaun JSMP nian ba iha tribunál distritál sira iha tinan 2020, ba kazu krime hamutuk 710 kazu no sivíl hamutuk 23 kazu. Husi númeru kazu ne'e maioria violénsia bazeia ba jéneru (532) no vítima barak liu maka fetu.

Enkuantu dezafiu ne'ebé hasoru iha momentu moras COVID-19 mosu primeiru iha Timor-Leste mak kazu violénsia bazeia ba jéneru barak mak la prosesu. Alende ne'e, dezafiu ida ne'ebé to'o agora Defensoria Públiku sira kontinua hasoru mak menus facilidade hanesan transporte no apoiu administrasaun sira.

Hatan ba pergunta kona-ba serake xefe suku sira bele rezolve kazu violénsia doméstika, Prokuradór Dr. Jacinto Babo Soares hatan katak kazu violénsia doméstika nu'udar krime públiku nune'e xefe suku sira laiha kompetensia atu rezolve, sekarik rezolve tuir kustume hanesan sirkunstánsia ida atu hakmaan bainhira prosesu julgamentu iha tribunál. Maibé bainhira xefe suku sira rezolve no taka de'it kazu ne'e mak iha ema ruma hatene ka vítima rasik mak mai hato'o keixa fali maka Ministériu Públiku sei loke fali prosesu kontra xefe suku ne'e ho artigu ida kona-ba la-partisipasaun ida ne'e bele kriminaliza.

Enkuantu kona-ba kazu menór, Prokuradór ne'e hateten katak Ministériu Públiku iha unidade ketak ne'ebé espesífiku ba asuntu menór nune'e bainhira mosu kazu sira envolve menór ligadu ho alimentasaun, Ministériu Públiku sei refere kedas ba iha tribunál hodi fiksa ninia alimentasaun hodi tribunál deside. Kuandu labarik nia aman maka lakohi kumpri entaun bele kondena nian aman ho krime la halotuir obrigasaun alimentár.

Parte seluk, hatan ba pergunta kona-ba hadau malu rai Estadu nian (ema ida mak hela no ema seluk faan tiha), Dr. Duarte Tilman Soares, hateten katak xefe suku sira tenke haree didi'ak kona-ba estatuta rai ne'e, partense ba Estadu entaun informa ba Diresaun Terras e Propriedade, Ministériu Justisa maibé bainhira rai ne'e Estadu nian no faan ona maka konsidera krime.

Enkunatu kona-ba kazu duun malu buan, tuir Adjunta Defensoria Públika, Dra. Olga Barreto Nunes katak Timor-Leste seidak iha lei espesífiku kona-ba buan tanba susar atu bele hetan prova katak ema ne'e buan ka la'e, maibé bainhira ema ne'ebé ita duun buan sente prejudikadu kona-ba ninia naran di'ak entaun bele loke prosesu sivíl kona-ba defamasaun no injúria.

Semináriu ne'e taka ho vizita Tribunál Dsitritál Dili ba partisipante sira balun no hetan akompañamentu husi ekipa JSMP. Partisipante sira agradese tebes ba JSMP tanba liuhusi semináriu ne'e, sira bele hetan oportunidade hodi rona direktamente esplikasaun kona-ba serbisu sira tribunál nian no mekanizmu atendentu sira iha tribunál inklui vizita tribunál.

Semináriu rejionál ne'e realiza husi JSMP ho parseiru suparta CEPAD no hetan fundus husi União Europeia.

Atu hetan informasaun liutan favór kontaktu:

Ana Paula Marçal  
Diretora Ezekutiva JSMP  
Telefone: 3323883/77040735  
Diresaun e-mail: [ana@jsmp.tl](mailto:ana@jsmp.tl)  
[info@jsmp.tl](mailto:info@jsmp.tl)  
Website: <http://jsmp.tl>